

欽
定
全
唐
文

欽定全唐文卷六百六十一目錄

新文藝出版社藏書

白居易六

除李遜京兆尹制

除孔戣等官制

除李建吏部員外郎制

除劉伯芻虢州刺史制

除周懷義豐州刺史天德軍使制

除某官王某魏博節度使制

除某節度留後起復制

除薛平鄭滑節度使制

除盧士玟劉從周等官制

張正一致仕制

張正甫蘇州刺史制

崔清晉州刺史制

除柳公綽御史中丞制

除田興工部尚書魏博節度使制

除鄭餘慶太子少傅制

除裴堪江西觀察使制

贈杜佑太尉制

除孔戢萬年縣令制

除裴向同州刺史制

除武元衡門下侍郎平章事制

除李夷簡西川節度使制

除袁滋襄陽節度使制

歸登右常侍制

李程行軍司馬制

李甌虞部郎中制

牛僧孺監察御史制

裴克諒量留制

張聿都水使者制

薛伾鄜坊觀察使制

韓愈比部郎中史館修撰制

李暈安州刺史制

竇易直可給事中制

孟簡賜紫金魚袋制

盧元輔杭州刺史制

傅良弼可鄭州刺史制

張徹宋申錫可並監察御史制

楊子留後殷彪授金州刺史兼侍御史河陰令韋
同憲授南鄭令韋弁授絳州長史三人同制

獨孤郁司勳郎中知制誥制

錢徽司封郎中知制誥制

馮宿除兵部郎中知制誥制

盧元輔吏部郎中制

鄭覃可給事中制

韋審規可西川節度副使御史中丞李虞仲崔戎
姚向溫會等並西川判官皆賜緋各檢校省官
兼御史制

欽定全唐文卷六百六十一

白居易 六

除李遜京兆尹制

近歲京兆長吏數遷誠不便時抑有其故或鈐鍵不謹吏緣爲姦或鈎距太煩人受其弊旣非中道皆不得已而罷之宜求恬智寬猛相濟者親諭斯旨使久於其職以息吾人浙江東道觀察使御史中丞李遜十年以來連守四郡或紛擾之際或荒饉之餘威惠所加罔不和輯賞其殊績擢在大藩自臨會稽一如舊政况省科禁以便俗通津梁

金匱要略卷之二十一
以息征動遵詔條溪副朝旨江南列鎮良帥則多集課程
功爾爲稱首而內史之選久難其人今予所求唯爾可使
雖表率州部其委非輕然尹正京師所資尤急宜輟材於
浩壤佇觀政於輦轂望爾有成無替厥命可權知京兆尹
除孔戣等官制

渾金璞玉方圭圓珠雖性異質殊皆國寶也是故能官人
者亦辨而用之諫議大夫孔戣靜專貞白不涉聲利執言
守事無所依違駕部郎中薛存誠廉潔直方飾以詞藻中
立不倚介然風規吏部員外郎王涯端明精實加之以敏

懿文茂學尤推於時並歷踐朝行恪勤官次諫垣郎署藹其休聲宜加公獎擢在近侍左右禁闥可以同升必能評奏臺議發揚綸誥臨事有立屬詞可觀各隨所長分命以職祇奉乃事無替厥猷幾存誠並可給事中涯可兵部員外郎知制誥

除李建吏部員外郎制

勅六官之屬選部郎首之歷代以來諸曹郎之中擇其踐歷久考第高加以有器局律度者遷焉今之選任亦由是矣兵部員外郎李建文行才理公勤課績可謂具美宜居

金史卷之二十一
二
厥官歲調方殷勉勤爾事可吏部員外郎

除劉伯芻虢州刺史制

給事中劉伯芻以文雅才名給事左闡實掌駁議再逾歲時亦謂恪勤宜從遷轉而虢畧近郡黎人未康藉爾良能爲予撫字懸賞佇効勉哉是行可授虢州刺史

除周懷義豐州刺史天德軍使制

西受降城尤居邊要西戎北虜介乎其間委之郡符建以戎號將守之選宜乎得人前汝州刺史周懷義久列禁衛嘗從征伐又領軍郡率著勤功宜加獎用可屬憂寄况茲

要鎮實扼戎吭犄角諸軍局鑄右地牧人訓旅兼領非輕
無替前勞在申後効可豐州刺史天德軍使

除某官王某魏博節度使制

師長之選重難其人況河上列城鄴中雄鎮初喪良帥思
安眾心若親與仁方膺是命某官王某出忠入孝根乎至
性好學樂善出於餘力發自修已施於爲政可以守土可
以長人今兩河之間三軍乏帥是用命爾領茲大藩澄清
魏風輯理相土爲我垣翰永孚於休往其欽哉無替厥職
可魏博等州節度觀察使

除某節度留後起復制

懋勲德者慶鍾於嗣襲忠順者教本於親於是乎有代及之恩有賞延之命所以光子道而激臣節也茲惟舊典可舉而行某官某惟乃祖父勤勞王家咸有忠功書於甲令降及於爾亦克負荷早承義訓久倅戎麾自罹憫凶能著誠敬恭俟朝命靖安人心雖在幼沖足可嘉獎今屬元戎初喪眾望禺然宜選親賢以爲統帥留府之事俾爾專之加戎秩以奪哀遷冬卿以示寵奉揚新命無忘前修爾宜懋哉懸賞佇効可節度留後檢校工部尚書

除薛平鄭滑節度使制

武牢以東至於白馬形勢之地水陸之會宜擇文武兼備者以爲守臣右衛將軍薛平自司禁旅爲我爪牙訓整警巡能宣其力嘗使於絕國可謂有勞嘗牧於大都亦聞有政況忠厚爲質通明爲用秉吏道之刀尺襲將門之弓裘可以爲三軍之帥可以理千乘之賦俾輟才於北落往節制於東方爾宜式遏四封輯寧百衆明簡稽以實軍旅信賞罰以勸吏人勉率乃職無忝厥命仍以冬卿副相兼而寵之可檢校工部尚書兼御史大夫鄭滑潁等州節度使

觀察處置等使

除盧士玟劉從周等官制

君有舉左史得書之政有關諫官得補之二職者歷朝之清選也前侍御史盧士玟嘗在西川時爲從事亂危潛伏能潔其身前監察御史劉從周頃佐宣城奉公守正端士之操終然不渝時所稱論並宜甄獎况學術詞藻見推於衆並命清貫僉以爲宜記事盡規各佇能效士玟可起居郎從周可右補闕

張正一致仕制

前諫議大夫張正一學行器用爲時所稱擢居諫官冀効忠讜雖年齒未暮而衰疾有加所宜願養不可牽率俾移優秩以從致政可國子司業致仕

張正甫蘇州刺史制

浙右列城吳郡爲大地廣人庶舊稱難理多選他郡二千石之良者轉而遷焉鄧州刺史張正甫自領南陽僅經三載廉平清簡以臨其人人安政和理行第一宜以大郡推而廣之用旌前勞且佇後効可蘇州刺史

崔清晉州刺史制

左司郎中崔清以才良行敏補尚書郎頗積功勤宜加獎
任頃嘗爲郡亦聞有政平陽舊壤時謂名藩得才與能方
可共理安人訓俗佇有成績可晉州刺史

除柳公綽御史中丞制

勅中憲之設糾謬懲違一引其綱百職具舉非清與直不
稱厥官諫議大夫柳公綽忠實有常文以詞學介然端直
有古之遺風頃居臺憲累次郎位持平守正人頗稱之擢
首諫司器望益重今副相缺位中司專席惟有守者可以
執憲惟無私者可以閑邪詢事審官爾當是選光昭新命

振起舊章宜一乃心以揚其職可御史大夫

除田興工部尚書魏博節度使制

馭下安人其道不一或序能以次用或因効以拔才所命雖殊同歸共理某職某官田興時屬本軍初喪戎帥亂政咸啟羣心不寧而興列在偏裨奮其義勇謀成必中事至能斷智畧所及指麾所加一軍獲安百眾附悅連獻章疏恭俟制命有節有理朕用嘉之夫以將材如彼軍情若此允膺不次之舉可責非常之功是用寵之冬卿擢爲大將仍以印綬就拜軍中其敬之哉無墮乃力可檢校工部尚

書兼御史大夫魏博等州節度觀察等使

除鄭餘慶太子少傅制

東朝三少歷代重選不必備位在乎得人吏部尚書鄭餘慶貞明儉素有古人風發自修身施於爲政出入中外多歷要重咸有勤績存於官次況動中禮法學綜儒元是謂羽儀之臣可居師傅之任輔我元子爾其勉歟可太子少傅

除裴堪江西觀察使制

江西七郡列邑數十土沃人庶今之奧區財賦孔殷國用

所繫茲爲重寄宜付長才同州刺史裴堪素蓄器幹久經
任遇日者資其忠諒入爲諫議大夫藉其良能出爲左馮
翊曾未周歲政立績成區區一郡未盡其用鍾陵要鎮可
以委之夫簡其條章平其賦役徇公率正以臨其人而人
不安未之有也祇服厥命往修乃官仍兼中憲以示優寵
可江西觀察使兼御史中丞

贈杜佑太尉制

生有爵祿歿有褒贈此王者所以崇哀榮之禮厚君臣之
恩況有輔臣所宜加等某官致仕佑以通濟之才公忠之

節逢時入用爲國大臣外領藩鎮內參台鉉積勤盡悴迨
過三紀左右於位亦旣八年天不憖遺奪我元老憫然興
歎實軫於懷永言褒榮俾峻禮命上公之秩用賁幽靈嗚
呼錄舊旌勞知予不忘可贈太尉

除孔戢萬年縣令制

京邑令缺多擇尚書郎有才理者補之兵部員外郎孔戢
自御史府遷夏官之屬凡所蒞職一心奉公在郎署間稱
有名實加以文學緣飾吏能俾宰京劇佇有成效

除裴向同州刺史制

馮翊之地密邇郊畿分內史之政參京師之化俾善所職
其在得人京兆少尹裴向器蘊利用學通政事久試吏治
頗著良能累守大郡入亞天府奉上撫下皆有可稱左輔
之重爾膺其選況征賦猶重人庶未康實望良才與之共
治勉副所舉往修厥官可同州刺史

除武元衡門下侍郎平章事制

門下朕嗣守丕業殆將十年實賴一二輔臣與之共理故
外鎮方域則仗以爲將有絳侯厚重之質有郤吉寬大之
風自登台司克厭人望頃屬巴蜀軍後人殘權委節旄俾

往鎮撫信及夷貊恩加疲瘵每因利以施惠不易俗而修
教政無苟得人用便安惠茲一方時乃之績報政既久屬
望益深宜歸左輔以參大政夫坦然公道可以敘眾才曠
然虛懷可以應羣務弼違救失不以尤悔爲慮進善絀惡
不以親讎自嫌用此輔君足爲名相欽率是道往復乃官
可門下侍郎同中書門下平章事

除李夷簡西川節度使制

征鎮之大實惟蜀川西距於戎南漸於海有重江複山之
險有長轂堅甲之旅水陸交會華夷雜居疇能治之我有

良帥山南東道節度使李夷簡以正事上以簡臨下仗茲
器用累當任遇執憲之難也爾爲臺丞其職甚舉司計之
重也爾調邦賦其効可稱爰資長才出領重鎮自總符鉞
於漢之南專奉詔條削去弊政均穀籍不一之賦罷舟車
無名之征近悅遠來歸如流水俗用丕變人迄小康三載
考功爾爲稱首進其右秩遷於大藩以均惠乎四方以旌
勸乎羣吏昔文翁明於教化种暘優於政能巴蜀之間遺
美猶在不替前効可以嗣之佇聞有成用光厥命可檢校
吏部尚書劍南西川節度等使

除袁滋襄陽節度使制

漢以二千石之良者入爲公卿周以六官之賢者出兼侯伯內外之任所命則殊至於治軍國寵忠賢其致一也戶部尚書袁滋奉上甚勤臨下甚簡安人拊衆尤是所長須資其能移鎮東郡畧其科禁緩其征徭政不滋彰人用休息在郡七載績成課高璽書徵還益聞遺愛老幼遮道事隣古人朕方勤卹疲民褒獎循吏累月再命其有旨哉舉鄭滑之政也故旌武公之美寵以司徒憂襄漢之人也故仗叔子之才委茲征鎮類能而使其在此乎勉揚厥聲無

替前効可某官充山南東道節度等使

歸登右常侍制

勅近侍之列騎省爲貴歷代迄今選任頗重必詢望實而後命之工部侍郎歸登朴忠沈厚心無詭詐介圭不飾止水無波澹然自居以致名稱抱此素行歷踐清貫掌議左掖貳職冬官歲時滋深體望益茂可以備顧問應對之選列言語侍從之臣冠附貂蟬立之於右訪諸時論僉以爲然可右散騎常侍

李程行軍司馬制

隋州刺史李程頃自周行出分憂寄漢南大郡守之五年頗著良能宜當選獎況專習文學通知兵事西南重鎮初委元戎慎選副車爾當此舉三軍之重俾往貳之仍加憲職以示優寵可御史中丞劍南西川行軍司馬

李甌虞部郎中制

金州刺史李甌雅有文藝飾以政事早從吏職久領郡符謹慎廉平頗副所任虞曹郎缺命以序遷敬茲寵命勉守厥位可尚書虞部郎中

牛僧孺監察御史制

河南縣尉牛僧孺志行修飾詞學優長頃對策於庭其詞
亮直累從吏職頗謂滯淹訪諸時論宜當朝選俾升憲府
以觀其才可監察御史

裴克諒量留制

華州刺史奏華陰令裴克諒在官清白奉法考秩向滿其
政如初借留三年用觀成績朕方旌求良吏俾養黎元適
副所懷宜可其奏

張聿都水使者制

前湖州長史張聿頃以藝文擢升朝列嘗求祿養出署外

金史卷之二十一
官名不爲身志亦可尚喪期既畢班序當遷俾領水衡以
從優秩可都水使者

薛伾鄜坊觀察使制

鄜時延安抵於中部羌夷種落散在其間戎夏雜居易擾
難理宜選寬明之使通知邊事者委以符節而糾綏之右
金吾將軍薛伾服勤戎職練達吏道出入中外綿歷歲年
能一乃心以宣其力自加寵遇再執金吾徼巡有嚴夙夜
匪懈在公若是何用不臧況爲人沈靜內肅外和按俗守
封是其所善宜輟務於誰何俾宣風於廉察庶乎勞徠諸

部綱紀列城奉詔條以安人參戎索以訓旅欽承厥命往復乃官仍踐冬卿式光重寄可檢校工部尚書充廊坊等州觀察使

韓愈比部郎中史館修撰制

勅太學博士韓愈學術精博文力雄健立詞措意有班馬之風求之一時甚不易得加以性方道直介然有守不交勢利自致名望可使執簡列爲史官記事書法必無所苟仍遷郎位用示褒升可依前件

李暈安州刺史制

宿州刺史李暈勲閥之門嗣生才畧久參戎衛頗著勤勞
試守列城觀其爲政屬汴泗之右創畫州居府署城池委
之經始一日必葺三年有成且聞公勤宜有遷轉重分憂
寄再佇良能往安吾人無忝厥命可安州刺史

竇易直可給事中制

前御史中丞竇易直器質智識厚重閒敏文合法要學通
政經累踐臺郎擢司邦憲寬猛舉措甚得其中官不易方
府無留事前因病免今以才遷俾升瑣闥以備顧問凡制
令奏議官獄典章苟有依違皆得駁正所任不細宜敬乃

官可給事中

孟簡賜紫金魚袋制

漢制二千石有政績者就加寵命不卽改移蓋欲使吏久於官人安其化也常州刺史孟簡簡易勤儉以養其人政不至嚴心未嘗怠曾未再稔績立風行歲課郡政毗陵爲最方求共理實獲我心宜加命服以示旌寵庶俾羣吏聞而勸焉宜賜紫金魚袋

盧元輔杭州刺史制

河南縣令盧元輔早以學藝列在周行嘗守商都頗聞有

政再領京縣益見其才江南列郡餘杭爲大征賦尤重疲人未康藉爾登車往分憂矚勞徠安輯稱朕意焉懸賞旌能以佇報政可杭州刺史

傅良弼可鄭州刺史制

勅金紫光祿大夫使持節沂州諸軍事行沂州刺史兼御史中丞騎都尉傅良弼燕冀之間紛擾之際多壘失守孤城保全介於險中率乃麾下轉戰郊野來覲闕庭徇義滅親忘家喪子忠勤勇烈人所難能若不褒升何勸來者海沂剖竹未足報功溱洧頒條可兼觀政敬承後命無替前

勞可使持節鄭州諸軍事行鄭州刺史兼御史大夫散官
勲如故

張徹宋申錫可並監察御史制

勅舊制副丞相缺中執憲得出入御史缺則於內外史中
考覈其實封奏其名以補之今御史中丞僧孺奏某官張
徹某官宋申錫皆方直強毅可監察御史章下丞相府丞
相亦曰可朕其從之並可監察御史

楊子留後殷彪授金州刺史兼侍御史河陰令韋
同憲授南鄭令韋弁授絳州長史三人同制

勅某官殷彪等今之郡守古侯伯也今之邑令古子男也
於吏有君臣之道焉於人有父母之道焉郡邑之間承上
率下者州長史也凡此之官與吾共理使吾人安而無怨
者其在吏良而政平乎金秦之郡也奏告專達得行異政
以彪清平信惠臨事能守大小之職率著名績故仍憲簡
俾往牧之南鄭梁之邑也上有賢帥無憂掣肘以同憲河
陰有政可以移用故換銅印俾往宰之而絳為名藩弁實
良士命之贊貳亦叶其宜宜各悉心修舉三職可依前件

獨孤郁司勳郎中知制誥制

考功員外郎知制誥獨孤郁學識文行時論所推選自外郎擢居右闔綸言樞命既重且難委以發揮甚聞稱職而端諒忠謹介然自居爲臣若斯足可嘉獎官當滿歲職亦逾年宜從美遷以光近侍可司勳郎中知制誥

錢徽司封郎中知制誥制

勅中臺草奏內庭掌文西掖書命皆難其人也非慎行敏識風學懿文四者兼之則不在此選祠部郎中翰林學士錢徽藹然儒風粲然詞藻縝密若玉端直如絃自參禁司益播其美貞方敬慎久而彌彰應對必見於據經奏議多

聞於削藁迨今六載其道如初嘉其忠勤宜有遷擢俾轉
郎吏仍參綸閣茲乃榮獎爾其敬承可依前件

馮宿除兵部郎中知制誥制

勅吾聞武德暨開元中有顏師古陳叔達蘇頌稱大手筆
掌書王命故一朝言語煥成文章朕承祖宗思濟其美凡
選一才補一職皆不敢輕易其庶幾前事乎刑部郎中馮
宿爲文甚正立意甚明筆力雄健不浮不鄙况立身守事
端方精敏而我誥命忽思潤色之聽諸人言曰宿也可宿
立朝歷御史博士郡守尚書郎在仕進途不爲不遇然不

登茲選未足其心故吾于今歸汝職業仍遷秩爲五兵郎中勉繼顏陳無辱吾舉可尚書兵部郎中知制誥

盧元輔吏部郎中制

勅六官之屬升降隨時獨吏部郎班秩加諸曹之右歷代迄今未嘗改也則其典職之重選用之精可知矣洛州刺史盧元輔深於文敏於行加以剗犀之利洞膽之明挈而用之無往不適連領大郡至於三四剗訛剔弊迎刃有聲宜付劇司俾之藻制曹選郎缺用爾補員歲調方殷佇揚乃職可尚書吏部郎中

鄭覃可給事中制

勅給事中之職凡制勅有不便於時者得封奏之刑獄有未合於理者得駁正之天下寃滯無告者得與御史糾理之有司選補不當者得與侍中裁退之率是而行號爲稱職固不專於掌侍奉讚詔令而已中大夫行諫議大夫雲騎尉滎陽縣開國男食邑三百戶鄭覃清節直行正色寡言先臣之風藹然猶在自居首諫益勵謇諤擢領是職必有可觀亦欲天下聞之知吾獎骨鯁之臣來諫諍之道也可給事中散官勲如故

韋審規可西川節度副使御史中丞李虞仲崔戎
姚向溫會等並西川判官皆賜緋各檢校省官
兼御史制

勅西川曰益部地有險府有兵礙戎屏華號爲難理故吾
命文昌爲帥長俾鎮撫焉次命審規爲上介俾左右焉又
命虞仲戎向會等爲庶寮俾咨度焉進言者謂文昌賢而
審規輩才以才佐賢蜀必理矣輟三署吏贊丞相府假憲
官職加臺郎暨一命再命之服以遣之其於張大光榮與
四方征鎮之賓寮不侔矣爾等苟佐吾丞相以善政聞使

吾無一方之憂吾寧久遺汝於諸侯乎爾其勉之可依前

件

欽定全唐文卷六百六十二目錄

白居易七

魏博軍將呂晁等從宏正到鎮州各加御史大夫

賓客等制

張平叔可戶部侍郎判度支制

李虞仲可兵部員外郎崔戎可戶部員外郎制

牛僧孺可戶部侍郎制

庾承宣可尚書右丞制

張聿可衢州刺史制

辛邱度可工部員外郎李石可左補闕李仍叔可

右補闕三人同制

魏博軍將薛之縱等十四人各授官爵制

裴度李夷簡王播鄭絀楊於陵等各賜爵并迴授

爵制

鄭餘慶楊同懸等十人亡母追贈郡國夫人制

李寘授咸陽令制

程羣授坊州司馬制

海州刺史王元輔加中丞制

楊潛可洋州刺史李繁可遂州刺史史備可濠州

刺史制

張洪相里友畧並山南東道判官同制

姚成節右神策將軍知軍事制

高鉞等一十人亡母鄭等太君制

柳公綽可吏部侍郎制

孔戣可右散騎常侍制

王公亮可商州刺史制

韋觀可給事中庾敬休可兵部郎中知制誥同制

李愬贈太尉制

田布贈右僕射制

韋貫之可工部尚書制

太子詹事劉元鼎可大理卿兼御史大夫充西番

盟會使右司郎中劉師老可守本官充盟會副

使通事舍人太僕丞李武可守本官兼監察御

史充盟會判官三人同制

許季同可祕書監制

張元夫可禮部員外郎制

楊嗣復可庫部郎中知制誥制

張平叔可京兆少尹知府事制

康日華贈坊州刺史制

張籍可水部員外郎制

何士乂可河南縣令制

崔植一子官迴授姪某制

王起等賜勲制

蕭俛除吏部尚書制

溫堯卿等授官賜緋充滄景江陵判官制

神策軍及諸道將士某等一千九百人各賜上柱

國勲制

李彤授檢校工部郎中充鄭滑節度副使王源中
授檢校刑部員外郎充觀察判官各兼侍御史
賜緋紫制

柳公綽父子溫贈尚書右僕射竇牟父叔向贈工
部尚書薛伯高父懌贈尚書司封郎中元宗簡
父琚贈尚書刑部侍郎皇甫鏞父愉贈尚書右
僕射韋文恪父漸贈太子少保王正雅父翊贈

太子太師范季睦父彥贈禮部郎中八人亡父
同制

欽定全唐文卷六百六十二

白居易

七

魏博軍將呂晁等從宏正到鎮州各加御史大夫
賓客等制

勅去年冬命侍中宏正建大將軍旗鼓移鎮於成德軍而
晁以下四十有一人實從魏來或驅或殿披堅執銳可謂
有勞宜以官坊之寮憲府之職隨其名秩序而寵之可依
前件

張平叔可戶部侍郎判度支制

勅故事君使臣其道不一或先勞而後受賞或先加寵而後責功蓋宜便有後先時事有緩急故耳朝議大夫守鴻臚卿兼御史大夫判度支上柱國賜紫金魚袋張平叔國之材臣也計能析秋毫吏畏如夏日司會逾月綱條甚張況師旅未息調食方急倚成取濟非爾而誰故自大鴻臚換居人部造膝而授不時而遷其要無他是欲急吾事而望倚爾功也公卿以降羣有司盈庭然問曰與吾坐而決事丞相以下不過四五而主計之臣在焉非智能則事不可成非諒直則吾難近噫職局之外得不思稱官望而厭

我心乎可守尚書戶部侍郎判度支散官勲賜如故

李虞仲可兵部員外郎崔戎可戶部員外郎制

勅劍南西川節度判官朝散大夫檢校尚書戶部郎中兼
侍御史上柱國賜紫金魚袋李虞仲劍南西川觀察判官
朝議郎檢校刑部員外郎兼侍御史雲騎尉賜緋魚袋崔
戎等去年春朕憂西南事授丞相文昌鉞鎮撫之次選郎
吏有才實如虞仲輩者往贊理之故其制云苟佐吾丞相
以善政聞寧久遺汝於諸侯乎今蜀政成矣蜀人又矣是
汝輩職修事舉而奉吾詔書甚謹也前言在耳安可弭忘

並命爲郎主吾信賞虞仲可行尚書兵部員外郎戎可尚書戶部員外郎散官勲如故

牛僧孺可戶部侍郎制

勅戶部侍郎周之地官小司徒也掌天下田戶之圖生齒之籍賦役貨幣之政令以待國用而質歲成元和以還日益寵重善其職者多登大任中茲選者莫匪正人誰其稱之我有邦彥朝議郎一作大夫守御史中丞上柱國賜紫金魚袋牛僧孺自舉賢良踐歷臺閣秉潤色筆提糾繆綱而書命無繁詞決事無留獄受寵有憂色納忠多苦言朕心知

之何用不可夫以人曹之重如彼僧孺之賢如此俾居是職不亦宜乎可守尚書戶部侍郎散官勲賜如故

庾承宣可尚書右丞制

勅朝議大夫守尚書刑部侍郎驍騎尉庾承宣昔我太宗文皇帝嘗謂尚書丞百職綱維事一失中則天下有受其弊者因命戴胄魏徵及杜正倫劉洎輩繼領是職分居左右官修事理人到於今稱之故吾前命崔戎一作從持左綱

今命承宣操右轄眾口籍籍頗爲得人况承宣端諒勤敏周知典故必能爲我紐有條之綱柅妄動之輪坐曹得出

入郎官立朝得奏彈御史決會政要扶樹理本無俾戴魏
劉杜專美於貞觀中可守尚書右丞散官勲如故

張聿可衢州刺史制

勅中散大夫行尚書工部員外郎上柱國吳縣開國男食
邑三百戶張聿內外庶官同歸共理牧守之任最親吾人
蓋弛張舉措由其心賞罰威福懸其手若一日失其職一
郡非其人而名未達於朝聽之間爲害已甚矣選授之際
得不慎夫以爾聿前領建溪有理行次臨沔郡著能名用
爾所長副吾所急宜輟郎署往頒詔條來暮之聲佇入吾

耳可使持節衢州刺史散官勲如故

辛邱度可工部員外郎李石可左補闕李仍叔可

右補闕三人同制

勅朝散大夫右補闕內供奉飛騎尉辛邱度等朕詔丞相
求方畧忠讜之士置於左右而播等以石暨仍叔應詔言
其爲人厚實審直嘗以文行謀畫從容於幕府之間臨事
敢言當官能守可使東帶同升諸朝又言邱度介潔靜專
不交勢利宜加推獎以勸其徒況久次者轉遷後來者登
進皆適所用平章可之可依前件

魏博軍將薛之縱等十四人各授官爵制

勅薛之縱等去年冬授愬錢俾自徐鎮潞而愬與其麾下
同德食不求飽席不暇煖節鎮殿定一如所委此誠愬之
忠畧然所賴之縱等焦心戮力同濟厥功而頒賞已踰時
秩宜加等我有爵祿分而命之知吾不遺細大之功可依
前件

裴度李夷簡王播鄭絪楊於陵等各賜爵并迴授
爵制

勅禮云臣下竭力盡忠以立功於國者必報之以爵祿此

言上之不虛取於下也而司空度等咸以忠力作股肱心膂之臣大節大勞書在甲令然則功如是忠如是高爵重秩予何愛焉故於統御之初先行信賞詔主爵者合爲奏書或加寵進封或延恩任子次勤第品咸按舊章行乎敬之無忝予一人之嘉命可依前件

鄭餘慶楊同懸等十人亡母追贈郡國夫人制

勅餘慶亡母某氏等夫德不旌則勸善之典缺矣親不顯則揚名之道廢矣凡今公卿大夫至於元士濟濟然抱忠履信立我朝者皆聖善之教燕翼之方所致也自家刑國

有所從來不大封崇是忘報施朕去年仲月統御之初發號推恩先降是命豈直光前慰後而已哉亦欲使天下爲母者聞庶幾乎善統其家慈訓其子厚人倫而美教化也可不務乎

李寘授咸陽令制

勅某官李寘近者西夷犯塞詔諸將出師司計臣俊言寘有應辨才可司饋餉故自京府掾假臺郎憲職以命之屬寇遁師旋未展其用況在公族推有器幹今授銅印俾宰咸陽夫庶官之任爲急西郊咫尺佇爾能聲可京兆府咸

陽縣令

程羣授坊州司馬制

勅程羣嘗從事於鎮冀之間病免所職垂老之歲棄爲窮人
俵俵無歸有足傷者夫一夫不獲若納諸隍此聖王用心
推已及物今宜與羣祿食使飽煖其身亦猶晉君不能
忘情於絳老也往佐中部爾其念哉可坊州司馬

海州刺史王元輔加中丞制

勅海州刺史王元輔漢制二千石有政績者就中加命秩
不卽改移蓋欲使吏久於官而人安於化也今元輔爲郡

頗有理名廉使上聞奏課居最宜加中憲旌而寵焉庶使
與君共理者聞而知勸可兼御史中丞

楊潛可洋州刺史李繁可遂州刺史史備可濠州
刺史制

勅朝散大夫守尚書金部郎中上柱國楊潛溫厚靜專有
端士之操朝議大夫前使持節吉州諸軍事吉州刺史上
柱國李繁精強博敏有才子之稱將仕郎前使持節光州
諸軍事守光州刺史雲騎尉史備變通健決有良吏之用
而能本於文學輔以政事爲郎見其行爲郡聞其聲夫洋

東梁之險遂居蜀之腴濠控淮之要三者皆名郡而委之
三吏得不思勤儉教導勞來安輯膏雨吾土襦袴吾人者
乎潛可使持節洋州諸軍事守洋州刺史散官勲如故繁
可使持節都督遂州諸軍事守遂州刺史備可使持節濠
州諸軍事守濠州刺史充團練渦口西城等使散官勲如
故

張洪相里友畧並山南東道判官同制

勅朝議郎守太常博士上柱國張洪前瀛漠等州都團練
判官朝議郎侍御史內供奉上柱國賜緋魚袋相里友畧

等元翼以大節大忠綽聞朝野授鉞開府殿我漢南而又求賢乞能以自參貳則其賓案宜有以稱之故求吾俊造之英勲列之冑達朝議而練戎事者與焉今以洪之知國禮奉家聲以友畧之富藝文飽軍旅兩中是選合而命之優秩寵章無所愛惜時無古今代有忠賢苟置吾元翼於羊杜間別有陟明之典在洪可檢校尚書職方員外郎兼侍御史充山南東道節度判官仍賜緋魚袋散官勲如故友畧可檢校尚書屯田員外郎兼侍御史充山南東道觀察判官散官勲如故

姚成節右神策將軍知軍事制

勅朝議郎前使持節成州諸軍事守成州刺史充本州守
捉使賜紫金魚袋姚成節嘗爲天平軍裨將當劉悟之立
忠勲也謀成事集爾有助焉雖授一城未足酬獎況聞信
厚勤恪宜於爪牙肘腋間居之昔漢文帝以宋昌忠勞擢
拜將軍掌宿衛今吾用汝猶前志也環拱之職得不勉歟
可毅果校尉守右神策將軍知軍事餘如故

高鉞等一十人亡母鄭等太君制

勅起居郎高鉞亡母滎陽郡太君鄭氏等予有侍臣咸士

之秀者或左右以書吾言動前後以補吾闕遺森然在庭
各舉其職爰思乃教知所從來豈非善稟於親行成於內
徙隣斷織訓使然耶不追封邑之榮曷顯統家之慶可依
前件

柳公綽可吏部侍郎制

勅京兆尹兼御史大夫柳公綽長吏數易爲害甚多邇來
都畿未免斯弊或苛急而人重困或懦弱而姦不息得其
中者其公綽乎細大必躬親剛柔不吐茹甚稱厥職惜而
不遷然智者常憂忠者常勞亦非吾以平施御臣下之道

也尚書六職天官首之辨論官材澄汰流品比諸內史選
妙秩清詢眾用能無易公綽爾宜飭躬承命以裴王崔毛
爲心苟副吾言用稱乃職而今而後亦何往而不適哉可
尚書吏部侍郎

孔幾可右散騎常侍制

勅昔齊桓公心體懈墮則隰朋侍漢成帝親重儒術則劉
向從今之常侍是其選矣稱其任者惟正人乎大中大夫
守尚書吏部侍郎上柱國賜紫金魚袋孔幾言行謹直風
操端莊肅然禮容清廟之器始自筮仕迄於天官虛舟爲

心利刃在手全才具美時論多之可使珥貂立吾左右從容侍從以備顧問隙朋劉向豈遠乎哉可右散騎常侍

王公亮可商州刺史制

勅尚書司門郎中王公亮茂於學精於文文學之外有析毫剌鐘之用自佐戎律領郡符持憲爲郎皆稱厥職吾前命劉遵古張平叔爲商州刺史繼有善政人用乂安今爾代之守而勿失况商土瘠商人貧可以靜理而阜安不宜改絃而易轍以爾精敏當自得中可商州刺史

韋觀可給事中庾敬休可兵部郎中知制誥同制

勅職之要莫先乎駁正文之選莫難於司言將使朝綱有
條朕命惟允在二者得人而已中大夫使持節蘇州諸軍
事守蘇州刺史上騎都尉韋覲精微專直通乎事典可使
平奏議而坐右

一作左

曹朝散大夫守尚書禮部郎中上柱

國庾敬休溫裕端明飾以辭藻可使書誥命而專右席而
輪轅鑿枘各適所宜夫惟刺史守列城郎官應列宿選任
倚注非不榮重然吾左右前後方求正人如覲敬休不宜
疎遠亦猶有聲之玉無類之珠不置佩服之中掌握之上
皆非其所也宜自敬謹無忝吾言覲可行給事中散官勲

如故敬休可尚書兵部郎中知制誥散官勲如故

李愬贈太尉制

勅故特進行太子少保上柱國涼國公食邑三千戶食實
封五百戶李愬在建中歲泚賊叛逆惟太師晟實仗大順
剪而誅之在元和朝蔡寇充斥惟爾愬實奮奇策虜而戮
之父子之功書於甲令俱爲第一焯燁當時矧爾一登將
壇六換鈇鉞坐論巖廊之道卧理保傅之事方深倚望奄
忽淪謝是用當食累嘆視朝三輟豈不以爪牙之威缺於
外股肱之痛軫於中者乎而弔奠之命賙賻之數雖加常

等未表殊恩宜以太尉之秩贈上公之袞斂俾爾被哀榮
服忠孝從先太師於九原也不其盛歟嗚呼美終必復禮
無不荅昔爾之勤勞如彼今吾之寵飾如此君臣報施可
謂兩臻其極焉爾靈有知欽我追命可贈太尉仍令所司
備禮冊命賜絹二千匹布七百端米粟一千石委度支送

田布贈右僕射制

勅朕聞古之臣子有忍死効節爲忠者有不傷髮膚全歸
爲孝者有不顧性命引決爲忠者但問所操所蹈何如耳
豈繫去就生死之間耶噫今有重義如泰山輕生如鴻毛

死而不朽者安得不褒揚寵飾使天下聞之所以勸孝心
激忠腸然後薄者敦懦者立幸生者恥格也故魏博等州
節度觀察處置等使起復寧遠將軍守右金吾大將軍員
外置同正員檢校工部尚書兼魏州大都督府長史御史
大夫賜紫金魚袋田布其父太尉甚賢此子鎮陽之亂宏
正歿焉而布枕戈嘗膽誓報冤恥故吾以大將軍之旗鼓
鈇鉞先臣之土壤士卒盡用委付親加勉諭人鬼之憤期
一洩而甘心焉旣而激發魏師出疆臨敵事有不得已者
布亦末如之何卒至於剖心自明遺疏自列謝君於天上

報父於地下可謂田氏有孝子國家有烈臣則吾之知臣
宏正之知子明矣聳動人聽盡傷我懷故廢臨朝所以示
哀也加禮命所以示榮也哀榮恩禮至則至矣嗚呼曾未
足以顯爾之節不厭吾之心乎可贈尚書右僕射賜布帛
三百段米粟二千石委度支逐便支遣

韋貫之可工部尚書制

勅河南尹韋貫之善馭者齊六轡善理者正六官六官成
則百事舉故吾選賢任舊以次第補之而六卿之材吾已
得五闕一不可待汝而成貫之以正行明誠爲先朝輔始

以直進終以直退道有消長德無緇磷及帥湘潭尹河洛而廉平清一之政繼聞於京師名簡吾心善入我耳宜置朝右以鎮厚時風況今之尚書漢之公卿也言動可否屬人耳目焉固不專率四屬程百工備位於冬官而已可工部尚書餘如故

太子詹事劉元鼎可大理卿兼御史大夫充西番盟會使右司郎中劉師老可守本官充盟會副使通事舍人太僕丞李武可守本官兼監察御史充盟會判官三人同制

勅太子詹事劉元鼎等夫選可任而任之則用無不適擇
可勞而勞之則事無不成蓋君使臣臣事君之大端也屬
西夷乞盟求可以涖之者歷選多士吾得三人今以元鼎
之博通師老之誠諒武之恭敏合而爲用不亦可乎爾宜
臨之以莊示之以信形儀辭氣皆有可觀必能率服彼戎
不獨益敬吾使法卿憲秩寵之以遣可依前件

許季同可祕書監制

勅大理卿許季同國朝以來有劉得

一作德

威張文瓘唐臨

爲大理卿有魏徵虞世南顏師古爲祕書監設官之重得

賢之盛人到於今稱之今季同以明慎欽恤理刑獄以文學博雅掌圖籍由廷尉而掌祕府論者榮之宜自重其官自遠其道又思與劉張唐魏虞顏爲比不亦自多乎可祕書監

張元夫可禮部員外郎制

勅殿中侍御史張元夫官有秩清而選妙者其儀曹員外郎之謂乎凡殿內御史雖文才秀出功課高等者滿歲而授猶曰美遷有如元夫連膺二遷歷彼踐此僉以爲宜况怒飛青冥翔集禁陛由茲去者十八九焉汝知之乎思有

以稱可尚書禮部員外郎

楊嗣復可庫部郎中知制誥制

勅權知兵部郎中楊嗣復朕聞前代制誥中書令侍郎舍人通掌之國朝以來或以他官兼領惟其人是用不限於資秩職署焉予以爲然多繇是選前所命者時稱得人研實覈名次第及汝汝嗣復根於義訓播爲令器文煥發而才秀出不當汨沒於郎吏間况貞元中汝父爲中書舍人甚稱厥職今使汝繼書吾命成一家言堂烜國華在於此舉爾宜兢兢祇勵無隕其名可庫部郎中知制誥

張平叔可京兆少尹知府事制

勅商州刺史張平叔爲人廉直爲政簡惠前後歷掾邑宰
郡守而去思來暮之謠繼聞於人聽焉及副鹽鐵官刺商
雒郡會課報政亦甲於他官自貞元以來用三科取士奉
詳明政術可以理人之詔而得其名有其實者幾何人哉
平叔居其一也能効若是何用不臧故事內史缺未補間
亞尹得行大京兆事試可而卽真者往往有之故其選任
日益難重爾宜稱所舉慎厥職無墮大以勤小無急弱以
緩強夕念朝行遵吾約束可京兆少尹知府事

康日華贈坊州刺史制

勅漢令軍中士有不幸死者得以棺斂傳送若是而已猶四方歸心焉矧吾喪贈以榮之惻隱以將之顯其忠撫其後亦所以激生者節豈獨慰逝者魂乎左神策軍赴行營正將試太常卿康日華領王師死王事軍書置奏朕甚悼焉可贈坊州刺史

張籍可水部員外郎制

勅登仕郎守國子博士張籍文教興則儒行顯王澤流則歌詩作若上以張教流澤爲意則服儒業詩者宜稍進之

欽定全唐文

卷六百六十二

白居易

五

頃籍自校祕文而訓國胄今又覈名揣稱以水曹郎處焉
前年以來凡厯文雅之選三矣然人皆以爾爲宜豈非篤
於學敏於行而貞退之道勝邪與之寵名可以獎夫不汲
汲於時者可尚書水部員外郎散官如故

何士乂可河南縣令制

勅漢朝郎官出宰百里故今京邑令缺多命尚書郎補焉
朝議郎行尚書水部員外郎何士乂慎檢和易介然有常
守而勿失可使從政然能佩弦以自導帶星以自勤則緩
急勞逸之間必使適宜而會理矣以爾思退故吾進之可

守河南縣令散官如故

崔植一子官迴授姪某制

勅丞相植典職樞務亦旣逾歲而能明我目達我聰左右
我躬以底於道況屬郊祀攝贊大儀寵錫之間植宜加等
而念其猶子乞用推恩旣叶舊章允膺新命其姪某可某
官

王起等賜勲制

勅中書舍人王起等朕臨御之始慶賞遂行卿士大夫遞
加勲秩自武騎尉以上十有二轉自起以下十有四人咸

金史卷之二十二
賜以勲舉書於籍可依前件

蕭俛除吏部尚書制

勅古者君使臣以禮臣事君以忠季代以還鮮由茲道先
皇帝常創於是故在位十五載凡解相印者殆二十人多
寵爲大僚或付以兵柄矧予小子宜有加焉而輔弼之臣
嘗經一日造吾膝沃吾心則思與之始終厚申恩禮不惟
勸感來者且不敢失墜先志也尚書右僕射蕭俛忠肅孝
敬佐吾爲理以勤事國以疾退身本末初終不失其道旣
免樞務倚爲右揆

一作俾居端揆

朕欲加恩超等復吾前言而俛

繼上讓章至於三四敦諭煩切陳乞彌堅是用正命爲選部尚書而冠六卿統百職尚可以表吾寵重亦所以成爾謙光爾宜欽厥始慎厥終毋忝我褒揚之命可吏部尚書

溫堯卿等授官賜緋充滄景江陵判官制

勅溫堯卿等今之俊乂先辟於征鎮次升於朝廷故幕府之選下臺閣一等異日入爲大夫公卿者十八九焉荆門景域南北大府而堯卿等或已參軍要或方受兵書各命以官分試其事名秩章綬分而寵之夫千里之行始於足下苟自強不息亦何遠而不屆哉可依前件

神策軍及諸道將士某等一千九百人各賜上柱
國勲制

勅古之善爲國者勞不忘而賞不濫有賞一人而爲僭者
有千百人而不爲費者其要在當否而已不繫於衆寡也
朕自統御已來忽忽有念念天下材力之將勇敢之士進
有征討之苦退有守捍之勤藏之中心何嘗暫忘而亟因
大慶恩洽普恩某等若干人咸進勲級並可上柱國

李彤授檢校工部郎中充鄭滑節度副使王源中
授檢校刑部員外郎充觀察判官各兼侍御史

賜緋紫制

勅萬年令李彤侍御史王源中等舜以五長綏四國若今之節制也周以十聯率諸侯若今之廉察也國家合爲一柄付有功諸侯故其陪臣選任益重或輟朝籍授簡書者往往而有況承元有大忠於國受重任於外使其承上涖下敬始善終實在庶寮叶力以濟今以彤宰京邑有理劇之用如水在器撓之不濁以源中立憲府有糾正之能如刃發硲割之無滯一可以倅戎事一可以佐輅車二職交修在此一舉臺郎憲吏金印銀章加乎爾身無忝我命可

依前件

柳公綽父子溫贈尚書右僕射竇牟父叔向贈工
部尚書薛伯高父懌贈尚書司封郎中元宗簡
父琚贈尚書刑部侍郎皇甫鏞父愉贈尚書右
僕射韋文恪父漸贈太子少保王正雅父翊贈
太子太師范季睦父彥贈禮部郎中八人亡父

同制

勅古人有云樹欲靜而風不止子欲養而親不待向無顯
揚褒贈之事則何以旌先臣德慰後嗣心乎故朕每施大

恩行大慶而哀榮之命未嘗闕焉銀青光祿大夫行尚書
吏部侍郎上護軍河東縣開國子柳公綽父溫等咸有令
子集於中朝資父事君移忠自孝本於嚴訓酬以寵名賜
命追榮各高其等嗚呼存者不置往者有知斯可以載揚
蘭陔之光輟風樹之嘆耳可依前件